


Novas marmiddesas

Follu de informu istitutzionali contivigiau de s'isportellu linguìsticu subra-comunali

N.º 1 - acabau su 15 de làmpadas de su 2016

Torrau a aberri su Servìtziu linguìsticu subra-comunali

Gràtzias a unu finantziamentu arribau de sa Regioni Autònoma de Sardìnnia cunforma a sa Lei regionali n.º 5/2015, at torrau a aberri su Servìtziu linguìsticu subra-comunali, contivigiau ocannu puru de is espertus de sa Sotziedadi Cooperativa "L'ALTRA CULTURA" de Aristanis.



Mancai sa sea, po chistionis de economia de tempus, siat in Baressa, s'ufitziu at a traballai po s'avaloramentu de sa lingua istòricu-identitària nosta finsas in Abas, Bobadri, Crucuris, Ollasta, Pau e Sini, totu Comunas chi giai de unus cantu annus megant de s'afateriai po chi sa genti sigat a chistionai in sardu in famìllia, in is ufitzius pùblicos, in crèsia, in iscola e in dònna logu.

S'operatori de isportellu est a disponimentu de tzitadinus, istudiantis, insegnantis, assòtzius culturalis, etc., po cali si siat informatzioni, aprofundimentu, duda, curiosidadi chi pertocat a sa lingua sarda e a s'impreu suu in is raportus cun s'Amministratzioni Pùblica, po consulèntzias bibliogràficas, sitogràficas e ortogràficas in contu de su sardu, po consulèntzias in sa carrera didàtica e in cussa giurìdicu-normativa.

Su Servìtziu aberit dònna mèrcuris a mangianu, de is 8.00 a is 14.00, in is localis de sa Domu comunali de Baressa (in su primu pianu). Si podit circai andendi-ddoi inderetura, telefonendi a su n.º 0783.027574 o mandendi una e-mail a s'indiritzu serviziocultura@comune.baressa.or.it

.

Mandiaris de su connotu

Una de is fainas chi su Servìtziu linguìsticu at a incarrerai est cussa de iscriri un'arregorta de arretzetas de mandiaris de su connotu. Apustis de sa ghia turìstica "De isciallu in isciallas ..." fata in su 2014, s'est pensau chi potzat essi praxili e profetosu a ponni paris in una *brochure* lèbia unas cantu pitàntzias chi, in is diis de festa o in is diis de faina, ajajus nostus acostumaiant a cuncordai. S'ufitziu de sa lingua si nd'at a incurai de ndi fai bessiri a pillu, in donniuna de is biddas nostas, is ingredientis, is cundimentus e is segretus de faidura de is mandiaris antigus, arraxonendi in contu de comentis si presentaiat sa dieta mediterrànea "a sa marmiddesa".




Chini totu bolit ghetai una manu de agjudu po cumpriri sa faina ddu podit fai sinnalendi is pitàntzias antigas a su Servìtziu linguìsticu.



In Abas

Po arregordu de Jennifer Scintu

Sa Giunta comunali de Abas at deliberau de intregai una bia a Jennifer Scintu, sa picioca abaresa de 29 annus morta su 22 de martzu de ocannu in s'atentau terrorìsticu in s'aeropurtu internatzionali de Bruxelles. Jennifer Scintu, mancai nàscia in Aachen, fiat iscrita in s'anàgrafi de is residentis in s'èsteru de su Comunu de Abas, fadendi parti de sa de tres generatzionis de una famìllia abaresa disterrada in is annus Sessanta in Germània po circai traballu. Dònna istadiali acostumaiat a torrai in vacàntzia a Abas, innui si ddoi firmaiat unas cantu diis po saludai a is parentis. S'Amministratzioni est pensendi de dd'intregai unu tretu de Bia de Donna Elena Salis, est a nai sa parti intra de Bia de Santa Maria e Bia de Marconi, s'arruga innui ddoi biviant is bisajus e ddoi sighint a bivi oindii parentis meda de custa picioca malassortada.



In Baressa

Laboratòrius de istadiali po pipius e piciocheddus

S'Amministratzioni comunali est cuncordendi po ocannu puru fainas de animatzioni e istentiu po pipius e piciocheddus de edadi intra de 5 e 14 annus. Sa punna de is 10 atòbius previdius, chi s'ant a fai o in is localis de s'asillu o in sa pratza ananti de sa Comunitadi-ospedàgiu po is antzianus, est cussa de favoressi sa sotzializatzioni de is piciocheddus, chi ant a podi pigai parti a is laboratòrius de istadiali gratis. S'Àrea sotziali de su Comunu est giai traballendi po ordingiai sa protzedura po s'afidu de s'interventu, chi at a incarrerai apustis de s'aprovu de su bilàntziu de previsionis po su 2016.




***Lìngua sarda ... unu mari de sabidoria.
Finsas in monti!***



In Bobadri

Consillu comunali nou



Su Sìndigu at convocau su primu atòbiu de su Consillu comunali nou, elìgiu su 5 de làmpadas, po giòbia 23 de làmpadas de su 2016, a ora de is 18.00. In su programma de chistionis ddoi est sa convàlida de is consilleris, sa giura de su Sìndigu, sa nòmina de sa Giunta comunali e de su Visu-sìndigu, sa nòmina de sa Cummissioni elettorali comunali.



In Crucuris

Cuncursu “Ligidori e libru istravanaus 2016”

Sa Biblioteca comunali de Crucuris, paris cun cussas de Gonnannò, Pompu e Sini, at bogau su Cuncursu “Ligidori e libru istravanaus 2016” po is iscientis de is iscolas elementaris e de is iscolas mèdias. Ddoi ant a podi pigai parti tres cambaradas de piciocheddas/us: cussus de sa prima e de sa segunda elementari; cussus de sa tertza, quarta e quinta elementari; cussus de sa prima, segunda e tertza mèdia. Sa faina s’ispòddiat de su 15 de làmpadas a su 21 de cabudanni de su 2016. S’arreglamentu cun totu is informus a fini fait a ddu ligi in su situ Internet istituzionali de su Comunu, me in s’indiritzu <http://egov2.halleysardegna.com/curcuris/hh/index.php> .



In Ollasta

Consillu comunali nou



De su Consillu comunali nou chi is Ollastesus ant stabilèssiu cun su votu insoru de su 5 de làmpadas ndi faint parti: Marco Marrocu (Sìndigu), Fabrizio Dedoni (Visu-sìndigu), Maurizio Mallocci (Assessori), Arduino Mallocci (Assessori), Pietro Cauli, Ignazio Serra, Massimo Mallocci, Mauro Pianu, Maria Luisa Caboni, Efisietto Serra e Roberto Mallocci.



In Pau


Po non si fai ispitzulai de sa sîntzula

De su situ istituzionali de su Comunu, me in s'indirizzu <http://www.comune.pau.or.it/pau/hh/index.php>, si ndi podint iscarrigai is consillus bellus po prevenni s'arriscu chi sa sîntzula atachit a s'òmini su virus de sa *West Nile Disease* o "Callentura de su Nilu". Sigomenti ancoras non s'agatat vacinu perunu contras de custa maladia, est pretzisu a non si fai ispitzulai de sa sîntzula ponendi zanzarieras in is fentanas, fadendi frigatzionis de pumada grisadora in sa peddi e bestendi-nosi comentu si depit candu seus in foras, prus che totu a s'arbescidòrgiu e a iscurigadòrgiu. Sa maladia, po mori de s'ispitzulu de sa sîntzula, podit atacai finsas a is cuaddus.



In Sini

Vacàntzia in logu de mari po pipius e piciocheddus



Aintru de su 23 de làmpadas de su 2016 is babbus e is mammas de is piciocheddus intra de 7 e 18 annus interessaus a pigai parti a una vacàntzia in logu de mari depint mandai a su Comunu sa domanda, chi si podit iscarrigai de su situ istituzionali me in s'indirizzu <http://www.comune.sini.or.it/Home/tabid/5080/Default.aspx>. Po sa vacàntzia, chi s'at a fai in Sardìnnia etotu e chi at a durai 11 diis, tocat a ponni unus 80-100 èurus de contributu,

est a nai su 25 % de cantu costat su servìtziu.

Servìtziu linguìsticu subra-comunali

Est abertu dònna mèrcuris a mangianu,

de is 8.00 a is 14.00,

in sa Domu comunali de Baressa.

Tel.: 0783.027574

E-mail: serviziocultura@comune.baressa.or.it